

# Qishloq hayoti

2013 йил Обод турмуш йили

Қишлоқ ҳаёти

Ўзбекистон Республикаси ижтимоий-иқтисодий газетаси [www.qishloqhayoti.uz](http://www.qishloqhayoti.uz) 2013-ЙИЛ 19-СЕНТАБР, ПАЙШАНБА, 113 (8194)-сон 1974-йил 1-январдан чиқа бoshлаган Bahosi kelishilgan narxda.

Наманган Вилояти

1 ОКТАБРЬ – ЎҚИТУВЧИЛАР ВА МУРАББИЙЛАР КУНИ



## ИҚТИДОРЛИ ЎҚУВЧИЛАР МАКТАБИ

**Д**авлатимиз раҳбарининг 2012 йил 10 декабрда қабул қилинган “Чет тилларни ўрганиш тизимини янада такомиллаштириш чора-тадбирлари тўғрисида”ги қарори ушбу йўналишда таълим сифати ва самардорлигини изчил оширишда муҳим омил бўлмоқда. Буни Наманган вилояти Поп туманидаги 11-сонли Давлат ихтисослаштирилган умумтаълим мактаб-интернати фаолияти мисолида ҳам

кўриш мумкин.

Бу ерда 400 нафар иқтидорли ўқувчи инглиз тилидан ташқари математика, кимё ва биология фанларини чуқур ўрганмоқда. Мактаб-интернатнинг фан, лаборатория ва компьютер хоналари, спорт зали, ётоқхона, ошхона, кутубхона, ташхис маркази ва тиббиёт хоналари замонавий усулда жиҳозланган. Ўқув машғулотларини юқори малакали педагоглар кўргазмали қуроллардан, техника во-

ситаларидан фойдаланган ҳолда олиб боради. Айниқса, чет тилини ўқитишда илғор педагогик технологиялардан самарали фойдаланиш, ўқувчиларда чет тилида эркин мулоқот кўникмасини кучайтириш ишларига алоҳида эътибор қаратилмоқда.

**СУРАТДА:** ўқитувчи Гулнора Ортиқова ўқувчилар Зийда Назирова ва Асқаржон Абдуғафоров билан.

Ҳотам МАМАДАЛИЕВ (ЎЗА) олган сурат.

## СОҒЛОМ ВА БАРКАМОЛ АВЛОД ҲАЁТИМИЗНИНГ ҲАЛ ҚИЛУВЧИ КУЧИ БЎЛИБ МАЙДОНГА ЧИҚМОҚДА

**Ҳар бир халқ ўз бағрида улғаяётган ёш авлод тимсолида асрий орзу-умидларини рўёбга чиқарувчи кучни кўриши табиий. Ушбу куч буюк мақсадлар сари тўғри ва муттасил йўналтирилсагина кўзланган натижаларга эришилади. Бунинг учун, аввало, ёшлар қалбига қулоқ солиш, уларни эзгуликка ундаш даркор.**

Президентимиз Ислам Каримов раҳнамолигида мустақиллигимизнинг дастлабки йилларидан жисмонан соғлом, маънавий етук, эркин фикрловчи ва келажакка ишонч билан қаровчи баркамол авлодни тарбиялаш масаласига энг устувор вазифа сифатида қаралмоқда. Зеро, ҳозирги тез ўзгарувчан дунёда ёшлари соғлом, баркамол ва ватанпарвар бўлиб вояга етаётган давлатларгина қудратлидир.

Давлатимиз раҳбари мустақиллигимизнинг йигирма икки йиллигига бағишланган тантанали ма-

росимдаги табрик сўзида ёшларга қарата шундай деди: “биз ўз олдимизга қўйган келажак буюк давлат қуришдек олижаноб мақсадга етиш йўлида мен сизлар каби мард ва шижоатли ёшларимизга, илму фан чўққиларини эгаллашга бел боғлаган, қийинчилик ва синовлар олдида бош эгмайдиған, бугун ҳаётимизнинг ҳал қилувчи кучи бўлиб майдонга чиқаётган соғлом ва баркамол авлодимизга ишонаман”.

(Давоми 2-саҳифада)



Тоҳир ИСТАТОВ (ЎЗА) олган сурат.





## МУЪЖАЗ ТЕЛЕФОН «МУЪЖИЗА»ЛАРИ

Энди сабоқ пайтида таълим олувчиларнинг ўй-хаёлларини чалғитмайди

**Яқинда қишлоққа кетаётиб, туман марказидаги Маиший хизмат кўрсатиш ва сервис касб-ҳунар коллежи ёнидан ўтаётганимда мобил телефоннида гаплашаётган бир ўқувчи беихтиёр эътиборимни тортди. У телефонда баланд овозда гапирар, беҳаё сўзлар билан суҳбатдошини камситар, хуллас, одоб-ахлоқ меъёрларига номуносиб ҳолда мулоқот қилар эди. Унинг бундай оҳангда берилиб гаплашаётганини кўриб, хаёлимга шундай ўй келди: у дарс вақтида ҳам шунга одатланмаганмикин? Мазкур савол мени чуқурроқ мулоҳазага ундади.**

Дастлаб телефон ихтиро қилинганида кўпчилик унинг истиқболига шубҳа билан қараган, одамлар бир-бирини кўрмасдан мулоқот қилишига ишониш қийин бўлган экан. Аммо инсониятнинг узоғини яқин, оғирини англи қилишда телефон беқиёс аҳамият касб этди. Йилдан-йилга такомиллашиб бораётган бу алоқа воситаси бугунги кунда одамлар ҳаётининг ажралмас қисмига айланди. Телефоннинг жуда тез оммалашшида мобил телефон тармоғининг кашф этилиши алоҳида аҳамият касб этгани ҳам шубҳасиз.

Бугунги даврни мобил телефонларисиз тасаввур этиб бўлмайди. Бироқ айна кунга келиб одамларнинг, айниқса, ёшларнинг мобил телефонга ҳаддан ташқари боғланиб қолаётгани бутун дунёда долзарб муаммага айланмоқда. Таассуфки, бу қурилма бераётган «имкониятлар» айрим

ҳолларда ундан фойдаланаётган болалар, ўсмирлар ва ёшларнинг соғлиги, онги ва тафаккурига турлича таъсир ўтказмоқда.

Ҳар нарсада меъёр керак! Асалнинг ҳам ози ширин деганларидек, мобил телефоннинг кенг имкониятларидан меъёрида фойдаланиш, ҳар ҳолда зиён қилмайди. Бу фикр, айниқса, ёш-авлод вакилларига тааллуқлидир. Чунки улар ўртасида мобил телефондан ноўрин фойдаланиш ҳоллари нохуш оқибатларни келтириб чиқараётгани бугун ҳеч кимга сир эмас. Бу борада мамлакатимизда таълим муассасаларида мобил телефонларидан фойдаланишнинг ҳуқуқий асослари белгилаб берилган.

Ўзбекистон Республикаси Вазирлар Маҳкамасининг 2012 йил 21 майдаги «Ўзбекистон Республикаси таълим муассасаларида мобил телефонлардан фойдаланишни тартибга солиш

чора-тадбирлари тўғрисида»ги қарори ҳам ўқув жараёнида, шу жумладан, таълим олувчилар томонидан телефонлардан фойдаланиш билан боғлиқ салбий жиҳатларнинг олдини олиш ва бартараф этиш мақсадида қабул қилинган. Ушбу қарорда белгиланганидек, таълим муассасаларида ўтказиладиган ўқув машғулоти ва тадбирлар бошланишидан олдин таълим олувчилар телефонларини ўчириб, сумкаларига солиб қўйишлари шарт.

Шунингдек, таълим олувчиларга телефонни бўйнига осиб юриш, чўнтақларида сақлаш қатъиян тақиқланади. Атрофдагиларга зўравонлик, шафқатсизлик, порнографияни тарғиб қилувчи видео ва суратларни намоиш қилиш, ўқув машғулоти вақтида телефон орқали сўзлашиш ҳамда турли хабарларни жўнатиш, телефонни стол устига қўйиш, мусиқа тинглаш, сурат ва видео-тасвирлар кўриш, диктофон, калькулятор, календар, блокнот, ён дафтэрча сифатида фойдаланиш ҳам тақиқлаб қўйилган. Мазкур қоидалар давлат ва нодавлат таълим муассасалари ходимлари учун бирдек тааллуқли бўлиб, унга кўра, ҳар бир таълим олувчи, ходим, меҳмон ва бошқа шахслар ўз телефонини «овозсиз» режимга ўтказиши шарт.

– Бу каби тартиб-қоидалар-

нинг жорий этилишидан мақсад таълим муассасаларида талаба-ёшларнинг ўқув машғулоти жараёнида ўз диққат-эътиборларини фақат билим олишга қаратидир, – дейди Низомий номидаги Тошкент давлат педагогика университети профессори, филология фанлари доктори И.Йўлдошев. – Юқорида зикр этилган талаблар ижросини таъминлаш борасида бир қатор тарғибот-ташвиқот ишлари амалга оширилмоқда. Аммо барча жойларда ҳам бу талабларга тўла амал қилинапти, деб бўлмайди. Мазкур алоқа воситасидан тўғри фойдалана билиш мақсадга мувофиқ. Ёшларимиз ўртасида мобил телефондан фойдаланиш маданиятини шакллантириш керак. Бунинг учун, биринчи навбатда, биз катталар уларга ўрнатилган бўлишимиз, оила тарбиясида бу масалага жиддий эътибор қаратишимиз лозим. Баъзи оилаларда бошланғич синф ўқувчиларига ҳам мобил телефон ҳамда кулоқлик олиб бериш ҳоллари учрамоқда. Эътибор беринг, тадқиқотчиларнинг фикрича, мобил телефондан доимий фойдаланиш инсон мияси, қолаверса, асаб тизими билан боғлиқ кўплаб ҳасталикларнинг келиб чиқишига сабаб бўлар экан. Энди масаланинг бошқа тарафига эътибор берайлик: бола ҳар куни

кулоқлик орқали мусиқа эшитиб юрибди, дейлик. Бунда, албатта, кулоқнинг эшитиш даражасидаги меъёр кескин бузилади. Ҳар қандай ҳолатда ҳам меъёр бузилса, зарар кўпаяди. Кулоқнинг эшитиш тизими табиатан бир меъёрга асосланади. Унинг супраси ташқи товушни туттишга ва кулоқ эшитиш қисмига уни маълум даражада филтрлаб етказишга мослашган. Энди тасаввур қилинг, кулоқликнинг товуш берувчи қисми кулоқ супрасидан ажралган ҳолда бевосита ички қисмига кучли товушни ҳеч қандай тўсиқсиз узатиб беради. Бу жараён сунункали давом этаверса, охири оқибат кулоқнинг товуш қабул қилиш пардалари ташқи товушни қабул қилишда қийналади, кулоқ «оғирлашиб» қолади. Бу яхши натижаларга олиб келмайди.

Телефондан узоқ вақт фойдаланган ва бу борада ишлаб чиқилган санитария меъёрлари ҳамда қоидаларига риоя этмаганларда кейинчалик асаб, кулоқ касалликлари, хафақонрак келиб чиқиши мутахассислар томонидан исботланган. Шундай экан, ҳар қандай илгор технологиялардан фойдаланишда унинг яхши ва ёмон томонларини ёдда тутишимиз, келажак авлод камолотига салбий таъсир этувчи ҳар қандай омилларнинг олдини олишга эътибор қаратишимиз лозим.

Шу ўринда таъкидлаш керакки, ўқувчи-талабаларга телефоннинг зарурати йўқ, дейиш ҳам унчалик тўғри эмас. Уларни миллий ўзбекона сайт ва тармоқларга қизиқтириб, ёшлар ўртасида интернет орқали маънавиятни оширишга хизмат қиладиган қизиқарли форумлар, ўйинлар ташкил этиб, кенг тарғиб қила олсак, албатта, бу борада ижобий самарага эришамиз.

Бугун айрим ёшларимиз мобил алоқа воситаси орқали турли электрон дарсликлар, бадий ва илмий адабиётлардан фойдаланиш, шунингдек, маълум порталлар, тармоқлар орқали бир қатор форумлар, маҳаллий ва халқаро конференция ҳамда танловлар ҳақида кенг маълумотлар олиш, уларда иштирок этиш имкониятига эга бўлмоқдалар. Бу, албатта, компьютерга қараганда ихчам, қулай ва арзон алоқа воситасидан тўғри йўлда фойдаланиш билан боғлиқдир.

Биобарин, мустақил Ватанимиз келажаги бўлмиш ёш авлоднинг тарбиялашда замонавий технология имкониятларидан кенг ва ижобий мақсадларда фойдаланиш, уларни чеклаш эмас, назорат орқали тўғри йўналтири билиш оилада ота-она, ўқув даргоҳларида устозларнинг, маҳаллақўйда ёши улугларимизнинг асосий вазифасидир.

**Жалол ИСАЕВ**

## МУСТАҚИЛЛИК МАДҲИ БОЛАЛАР ИЖОДИДА

**Ўзбекистон Республикаси Халқ таълими вазирлиги, Ўзбекистон Ёзувчилар уюшмаси, Республика болалар кутубхонаси ҳамда «Тонг юлдузи» болалар газетаси ҳамкорлигида мамлакатимиз мустақиллигининг 22 йиллиги ҳамда 2013 йил – Обод турмуш йилига бағишлаб «Мустақиллик мадҳи болалар ижодида» мавзусида Республика ижодий ишлар кўрик-танлови ўтказилди.**

Унда республикамиз умумтаълим мактабларининг 1-9-синф ўқувчилари ўзларининг Она Ватан, Мустақиллик, эл-юрт, таълим муассасалари ҳақидаги иншоари, шеърлари ҳамда тасвирий санъат йўналишидаги ижодий ишлари билан иштирок этди.

Танловга мингдан зиёд ўқувчилардан хатлар келди. Танловга юборилган энг яхши ижод намуналари «Тонг юлдузи» болалар газетасида мунтазам чоп этиб борилди.

Яқинда танлов ғолибларини тақдирлаш маросими бўлиб ўтди.

– Дилимдаги орзулар, кечинмалар шеър бўлиб

қоғозга тушади, – дейди Термиз шаҳридаги 3-умумтаълим мактаби 8-синф ўқувчиси Комила Шойимова. – «Қалдирғоч парвози», «Юртнинг эрка қизиман», «Кўнгил чаманида» каби шеърини тўпламларим чоп этилган. Кўрик-танловга ўзимнинг Ватан, она ва мактаб ҳақида ёзган шеърларимни юборгандим. Мени танловда ғолиб деб топишди. Бундан ниҳоятда хурсандман. Бу рағбат мени руҳлантириб, кўнгилimgа олам-олам орзуларни солмоқда.

Юртимизда истеъдодли ёшлар кўп. Ҳар бирининг Ватан ҳақида айтар сўзи бор. Уни кимдир шеърда, кимдир насрда, яна кимдир эса сурат-

лар орқали ифода этади.

– Мен Она Ватанимни ранглар орқали тасвирлашни жуда ёқтираман, – дейди Жиззах туманидаги 10-умумтаълим мактабининг 1-синф ўқувчиси Асадбек Аҳмедов. – Кўрик-танловнинг тасвирий-санъат йўналишида иккинчи ўринни олдим. Бундан жуда хурсандман. Бу танлов бизни янги мақсадлар сари руҳлантиради.

Сирасини айтганда, мазкур танлов ҳам мамлакатимизда ёшларнинг ҳар томонлама баркамол авлод бўлиб вояга етишида, ёш авлоднинг қалбидаги Она Ватанга меҳр-муҳаббат туйғусини янада мустақамлашга хизмат қилади.

Танлов ғолиблари ташкилотчиларнинг эсдалик совғалари билан тақдирланди. Болажонлар томонидан тайёрланган Ватанни тараннум этувчи куй-қўшиқлар тадбирга янада файз киритди.

**Гулноза ТУРҒУНБОЕВА,**  
«Qishloq hayoti» муҳбири.

# ЙЎНАЛИШСИЗ ТАКСИ: ҚУЛАЙЛИК, ИМКОНИЯТ ВА МУАММОЛАР

Абдунаби ота вилоят марказига келгач, машинадан тушди-ю, йўлнинг чеккасидан кетаётган тенг-кури Абдусоққа дуч келди. Иккала дўст бир-бирини бағрига босиб кўришдилар. Замонга тинчлик, халқимизга фаровонлик тилаб, мамнунликларини баҳам кўрдилар.

— Кўп қаватли иморатлар, равон йўллар, замонавий турар-жойлару бошқа мажмуаларни кўйинг, — деди Абдунаби ота, — йўлни тўлдириб кетаётган автомобилларни айтмайсизми, истаган томонингизга бир зумда етиб борасиз.

— Боз устига, уларнинг кўпчилиги ўзимизнинг юртимизда ишлаб чиқарилаётганини айтинг, — деди Абдусоқ ота.

Ана шу суҳбат сабаб йўналишсиз таксилар фаолиятининг қулай ва самарали эканини эътироф этган ҳолда соҳада ҳали-ҳануз учраб турган баъзи камчиликлар, ноқулайликлар ва кўзбўямачиликлар ҳақида сўз юритишни лозим топдик.

Президентимизнинг 2006 йил 9 мартдаги «Автомобил транспортида йўловчилар ташиш соҳасидаги тадбиркорлик фаолиятининг алоҳида турларини амалга оширишни тартибга солиш тўғрисида»ги ҳамда Ўзбекистон Республикаси Вазирилари Маҳкамасининг 2011 йил 18 майдаги «Йўналишсиз таксилар фаолиятини тартибга солиш чора-тадбирлари тўғрисида»ги Қарорлари бу борадаги ишларни тартибга солишда алоҳида аҳамият касб этмоқда.

Айни вақтда Қашқадарё вилоятида 134 та транспорт уюшмаси фаолият кўрсатяпти. Жорий йилнинг 7 ойи давомида вилоятдаги мазкур транспорт уюшмалари томонидан давлат хазинасига 5580,6 миллион сўм нақд пул тушди.

Аммо эришилаётган натижаларни бугунги имконият ва талаблар даражасида деб бўлмади. Чунки айни кунда транспорт уюшмалари ҳисобидаги 2938 та автотранспорт воситасидан атиги 894 таси

фаолият кўрсатяпти. Натижада белгиланган режалар тўлиқ бажарилмаяпти.

Айниқса, Касби туманидаги «Нурафшон йўл» МЧЖ, Косон туманидаги «Шукуров Иброҳим Зарипович», Яккабоғ туманидаги «Яккабоғ автомобилчи» хусусий корхоналари, Фузор туманидаги «Фузор медиатор транс» МЧЖ, Қарши шаҳридаги «Ҳамкор автотранс» корхонаси ва «Гранд аудио-видео» МЧЖ каби бир қатор уюшмаларда бу борадаги кўрсаткичлар ниҳоятда паст.

Вилоят бўйича бир автотранспорт воситаси учун кунлик нақд пул тушуми 36,1 минг сўмни ташкил этаётгани ҳолда, ушбу кўрсаткич Фузор, Қамаш, Касби, Муборак, Нишон, Чироқчи ва Шаҳрисабз туманларида 26-27 минг сўмдан ошмаяпти.

Вилоят давлат солиқ ва ички ишлар бошқармалари ҳамда Ўзбекистон автомобиль ва дарё транспорти агентлиги вилоят ҳудудий бўлими ҳамкорлигида юқорида айтилган қарорлар ижросини таъминлаш, йўловчи ташувчи транспорт воситалари фаолиятини назорат қилиш ва тартибга солиш юзасидан йиллик чора-тадбирлар режаси ишлаб чиқилган. Ушбу режага асосан олиб борилган қўшма рейд тадбирлари натижасида жорий



йилнинг 7 ойида ўтказилган 371 та текширувда 400 та ҳолатдаги ҳуқуқбузарлик аниқланиб, уларга нисбатан 242,1 миллион сўм маъмурий жарима чоралари қўлланилди. Жорий йилнинг ўтган даврида вилоятдаги автоюшмаларда ўтказилган қисқа муддатли текширувларда 166 миллион сўм нақд пул банк муассасаларига топширилмаганлиги маълум бўлди.

Ўзбекистон Республикаси Бош прокуратураси ҳузуридаги СВОЖДЛҚК департаменти вилоят бошқармасининг «Ҳужжатли тафтиш тайинлаш тўғрисида»ги Қарори асосида «Транс инвест сервис» МЧЖнинг 2008-2012 йиллардаги молиявий ҳужжалик фаолияти ўрганилганда, 94,4 миллион сўмлик солиқ ва бошқа тўловлар кечиктирилганлиги аниқланиб, бунинг учун 29,7 миллион сўм устама жарима ҳисобланди. МЧЖ томонидан 94 та юк автомобили ижарага олиниб, ҳайдовчиларига нисбатан буйруқ асосида ҳар ойда

энг кам иш ҳақининг бир баробаридан кам бўлмаган миқдорда ягона ижтимоий тўлов ҳисобланмаган. Бундай нуқсонлар департамент томонидан ўтказилаётган текширувларда Фузор туманидаги «Golden-guzar-avto» МЧЖ фаолиятида ҳам кузатилди.

Шунингдек, автомобиль транспортида тижорат асосида йўловчи ташиш фаолияти билан шуғулланувчи транспорт уюшмалари фаолияти камерал назоратдан ўтказилганида 2012 йил ва 2013 йилнинг 7 ойи давомида бюджет ва бюджетдан ташқари мақсадли жамғармалардан қарздорликлари ўсиб кетишига сабаб бўлмоқда.

Юқоридаги камчиликлар пировард натижада давлатимиз бюджетига, шунингдек, нақд пул тушумига маълум миқдорда салбий таъсир этаётганлиги боис, бу борада ўз вақтида тегишли чора-тадбирлар кўриш лозим бўлади.

Кўпгина транспорт уюшмалари раҳбариятининг солиқ қонунчилигини мукамал билмаслиги, солиқ ва тўловлар бўйича ўз мажбуриятларини лозим даражада бажармасликлари корхоналарнинг бюджет ва бюджетдан ташқари мақсадли жамғармалардан қарздорликлари ўсиб кетишига сабаб бўлмоқда.

Юқоридаги камчиликлар пировард натижада давлатимиз бюджетига, шунингдек, нақд пул тушумига маълум миқдорда салбий таъсир этаётганлиги боис, бу борада ўз вақтида тегишли чора-тадбирлар кўриш лозим бўлади.

**Қурбон ЭГАМБЕРДИЕВ,**  
**Қашқадарё вилояти**  
**Давлат солиқ бошқармаси**  
**бўлим бошлиғи.**

## ▼ БОЖХОНА НАЗОРАТИ

# «УЧОЛМАГАН» ВАЛЮТАЛАР

**Хорижга қандай мақсадда бўлишидан қатъи назар, қуруқ ҳамён билан чиқилмаслиги аниқ. Лекин бу мамлакатимиздаги нақд хорижий валюталарни исталганча ташиб кетиш мумкин дегани эмас!**

Амалдаги тартибларга мувофиқ, республикамизда резидентларга 2000 АҚШ доллари эквивалентидаги нақд хорижий валютани божхона баённомасида ёзма қайд этиш шарти билан эркин олиб чиқиб кетишларига рухсат этилади. Бундан ортиқ миқдордаги нақд валюталарни олиб чиқиш учун эса ваколатли банклар ёки Марказий банкнинг ўрнатилган тартибдаги рухсатномаси талаб этилади. Юртимиздан чиқиб кетаётган хорижий фуқаролар эса кириш чоғида олиб кирган нақд валюталари миқдорига тенг валютани олиб чиқиб кетишлари мумкин.

Мазкур тартиблар ҳақида батафсил эслатмалар барча божхона постларининг баённомаларни тўлдириш устунларига ўзбек, рус ва инглиз тилларида ёзиб қўйилганига қарамай, сафарга отланган

юртдошларимиз ва хорижликлар томонидан нақд хорижий валюталарнинг ноқонуний олиб чиқилиши билан боғлиқ ҳолатлар учраб турибди. Бу эса сири фош бўлгач, амалдаги тартиблардан бе-хабарлигини пеш қиладиган қонунбузарларнинг аслида божхоначиларнинг кўзини шамғалат қилишга уриниши иш бермаганини англатади.

Яқинда «Тошкент-Аэро» ихтисослаштирилган божхона комплекси ходимлари томонидан шу турдаги бир нечта қонунбузарлик ҳолатларининг олди олинди.

Жумладан, Россия Федерацияси фуқароси А.Муллаярова Санкт-Петербургда парвози олдидан салкам 60 минг Россия рублини божхона баённомасида қайд этишни «унутиб» қўйибди. «Паришонхотирлик» оқибатида унинг яна бир

юртдоши — Новосибирска отланган Н.Нижегородова ҳам 65 минг Россия рубли билан «хайрлашиши»га тўғри келди.

Сурхондарёлик С.Володовнинг божхона баённомасида қайд этмаган, демак-ки, яширинча олиб ўтишга уринган нақд хорижий валютаси 80 минг Россия рублини ташкил қилди.

«Тошкент-Пекин» рейси олдидан божхона кўригидан ўтказилган хитойлик Ц.Чэннинг эса қиймати 4,6 млн. сўмдан ортиқ эквивалентдаги нақд хорижий валюталарни яширинча олиб ўтиш режаси иш бермади.

Москвалик Р.Дёмин божхона баённомасида ва оғзаки сўровлар пайтида маълум қилинмаган 3,5 минг АҚШ долларининг божхона кўриги пайтида қўл сумкасида «пайдо» бўлиб қолганидан гўёки ҳайратга тушди.

Австриялик Ф.Штайнер ҳам ўзи ташриф буюрган давлатнинг божхона қоидаларини менсимаслиги оқибатида Россия Федерацияси пойтахтига 6,6 минг АҚШ долларисиз кетишга мажбур бўлди.

«Ҳайри ўйини ўйлаунча, таваккалчи ишини битиради». Афсуски, бу нақл

«Тошкент-Истамбул» рейси бўйича парвозга отланган учтепалик Г.Шодиевага наф бермади. У 13 минг 800 АҚШ долларини яширинча олиб ўтишга таваккал қилиб, қаттиқ адашди.

Шу тарзда панд еган қонунбузарлар сафида туркиялик С.Тосун ҳам бор. Юқорида санаб ўтилган «қахрамон»лар орасида у амалдаги тартибларга зид равишда олиб чиқишга уринган 14 минг АҚШ доллари билан «етакчи»ликни ўз қўлига олди.

Ҳозирда юқоридаги ҳолатлар юзасидан божхона текширувлари ва суриштирув ҳаракатлари давом эттирилмоқда.

Таъкидлаш жоизки, 2013 йилнинг ўтган 8 ойи мобайнида «Тошкент-Аэро» ИБК ходимлари томонидан бошқа ҳуқуқни муҳофаза қилувчи идоралар вакиллари билан ҳамкорликда аниқланган 225 та қонунбузарлик ҳолатларида 981 млн. сўмдан ортиқ эквивалентдаги нақд хорижий валюталарнинг ноқонуний олиб чиқилишига чек қўйилди.

**«Тошкент-Аэро» ИБК**  
**Ахборот хизмати**







